

守山閣叢書

經集

守山閣叢書

卷一

三家詩拾遺

三
聖
帝
尊

欽定四庫全書提要

三家詩拾遺十卷

國朝范家相撰家相字蘅洲會稽人乾隆甲戌進士官至柳州府知府漢代傳詩者四家隋書經籍志稱齊詩亡於魏魯詩亡於西晉惟韓詩存宋修太平御覽多引韓詩崇文總目亦著錄劉安世晁說之尙時時述其遺說而南渡儒者不復論及知亡於政和建炎間也自鄭樵以後說詩者務立新義以掊擊漢儒爲能三家之遺文遂散佚而不可復問王應麟於咸淳之末始掇拾殘賸輯爲詩考三卷然創始難工多所挂漏又增掇逸詩篇目雜採諸子依託之說亦頗少持擇家相是編因王氏

之書重加裒益而少變其體例首爲古文考異次爲古
逸詩次以三百篇爲綱而三家佚說一一併見較王氏
所錄以三家各自爲篇者亦較易循覽惟其以三家詩
拾遺爲名則古文考異不盡三家之文者自宜附錄其
逸詩不繫於三家者自宜芟除乃一例收入未免失於
貪多且冠於篇端使開卷卽名實相乖尤非體例其中
如張超稱關雎爲畢公作一條說見超所作誚蔡邕青
衣賦非超別有解經之說而但據詩補傳所載泛稱張超
云云並不錄其賦語蒐采亦間有未周然較王氏之書
則詳贍遠矣近時嚴虞惇作詩經質疑內有三家遺說
一篇又惠棟九經古義余蕭客古經解鈎沈於三家亦

均有採掇論其貶備亦尙不及是編也

自序

魯齊燕韓詩在漢最爲早出後爲毛公所掩遂至亡佚歷唐
宋至今未有舉其遺說而述之者嘗疑三家師承至遠其弟
子如孔安國匡衡王吉諸人皆當世名儒申公之師浮邱伯
與毛本出一家何至相懸如是因集三家之說散見于經傳
子史之引用者反覆推覽多與禮記周官左國不合而毛獨
條條可復此毛之所以得掩前人者然三家之說令人欣然
頤解者固觸目皆是也經師專已守殘冒黎深嫉其弊今之
學者視漢唐注疏若可覆瓿不知注疏未可廢也義理求而
日出古注亦探而彌新漢唐縱有缺敗其可傳者自在豈可
任其散佚而不爲之收拾哉嗟乎詩自朱傳之出卽毛傳尙

束之高閣何論三家然集傳每取匡劉韓子之說以糾毛傳之失矣非其說之原有可信者在歟今使三家之書與毛俱存則朱子之駁三家者當甚于毛唯僅存一二見其有裨于經而採之彌覺其可重然則三家之說之是者固當信從其非者亦不妨任其兩存也余因毛鄭箋傳之不行于世而有感于三家之亡于是就深寧王氏之詩攷更爲蒐補稍爲推論其得失附以古文考異及逸詩二卷名之曰拾遺將以問諸好古之士乾隆庚辰四月長至後十日會稽范家相自序

凡例

一三家詩魯最先出齊次之韓又次之故所錄遺說以魯齊韓爲次間有補入則錯次錄之

一經文所標俱從毛詩不列其義但錄三家遺說殘章片語俱加輯錄仍疏其得失于後

一三家文字異者與經書子史所引古文奇字統爲一卷列之於首以廣見聞其三家文字既異仍別有意義者重錄於各章各句之下書曰某作某然後可覽其說焉其文字異而義同者不重出

一古逸詩或爲孔筆所刪或刪後之詩皆見經傳子史之引述三家如雨無正鼓鐘般諸篇句有逸出毛詩者皆

當輯錄故統爲一卷次於文字考異後

一三家齊詩存者絕少魯訓故傳亦復無多唯韓詩亡於北宋所存頗見一斑凡所輯錄必注明出於何書

一魯之孔安國劉向齊之匡衡翼奉韓之王吉諸人皆傳一家之學無所出入其董江都賈長沙班孟堅諸說未知的出何家者則但標其名鄭司農少受韓詩兼通齊魯後乃箋毛今本所自言出於何家之說分別書之

一韓詩外傳雖皆引詩証事亦時見本義間有節錄

一三家訓故傳說遺文悉錄原文不遺一字其他各家所引述非有裨於經義者不錄

一是編本王氏詩考更加蒐補刪正以成書掛漏錯失在

所難免博雅之士聊以爲津筏可也其本論則具載詩
瀋中矣

御書

御書

三家詩源流

三家總記

漢書曰漢興魯申公爲詩訓故而齊轅固生燕韓生皆爲之傳或取春秋采雜說咸非其本義與不得已魯最爲近之應劭曰申公作魯詩后蒼作齊詩韓嬰作韓詩

隋經籍志曰漢初魯人申公受詩於浮邱伯作訓詁是爲魯詩轅固生亦傳詩是爲齊詩燕人韓嬰亦傳詩是爲韓詩終於後漢三家並立齊詩魏代已亡魯詩亡於西晉韓詩雖存無傳之者

按韓詩內傳太平御覽尙引其文劉安世以爲少時嘗讀韓詩是內傳之亡當在北宋之末今所存者外傳十卷而

已

魯詩傳授

漢書曰楚元王交字游高祖同父少弟也少時嘗與魯穆生
白生申公俱受詩於浮邱伯伯者孫卿門人也高后時浮邱
伯在長安元王遣子郢客與申公俱卒業元王好詩諸子皆
讀詩申公始爲詩傳號魯詩元王亦次之詩傳號元王詩○

原本此下有傳
字依漢書刪

漢書申公魯人少從楚元王俱事齊人浮邱伯受詩漢興高
祖過魯申公以弟子從師入見於魯南宮武帝使使束帛加
璧安車以蒲裹輪駕駟迎申公至時已八十餘以爲大中大
夫病免歸數年卒弟子爲博士十餘人孔安國周霸夏寬碭

魯賜蘭陵繆生徐偃鄒人闕門慶忌申公卒以詩春秋授而
瑕邱江公盡能傳之及魯許生免中徐公皆守學教授韋賢
治詩至丞相子元成以淮陽中尉論石渠後亦至丞相由是
魯詩有韋氏學王式翁思事免中徐公及許生爲昌邑王師
山陽張長安幼君先事式後東平唐長賓沛褚少孫亦來事
式皆爲博士由是魯詩有張唐褚氏之學張生兄子游卿爲
諫大夫其門人瑯琊王扶陳留許晏由是張家有許氏學按魯詩與韋賢同時者有章氏學後漢武榮治韋氏章句有武氏學不可悉載

陸德明曰申公以詩經爲訓故以教無傳疑者則闕弗傳

藝文

志號曰魯詩弟子爲博士者十餘人郎中王臧御史大夫趙

綰臨淮太守孔安國膠西內史周霸城陽內史夏寬東海太